

斫桂山房詩存

余非知詩者何只論詩  
敢序一瓢之詩然竊聞朱  
子一說謂詩必洗滌盡風  
生腸胃間葷血脂膏而後  
語有所措此言劇為有味  
一瓢天分故勝隱於鑿折  
節讀書亦舉體無常人事

工書善畫。及走馬射生。  
投壺擊劍。極物外跌蕩之  
致。獨不耐世味。猥瑣齷齪。  
與時俯仰。即事即目。每出  
一詩。以歌咏太平。徃々風  
流挺特。無不滿人意。所謂  
夙生穢濁。固憂々乎洗滌。

殆盡耶早歲詩名與竹塢  
歸愚翁相頡頏今

詔徵宏詞歸愚起就大科

一瓢與余並論薦余挹風

痺之疾不敢應一瓢亦以

母夫人春秋踰八十辭款

款有願養志白華南陔鶴

夢松聲其大趣與風雅旨  
歸胚胎溫釀尋討得古人  
直截根源又何論出入唐  
宋規、格律聲調極煅煉  
變化為能事委序詩存不  
過排次全詩之一間有不  
甚愜作未經割舍者昔君

家太拙尚書以詩道為已  
任好句膾炙當時厥後陸  
榮望為之刪錄以寫藏翠  
山書院者為定本則一瓢  
之寓名詩存與他集同雕  
流布更俟論擇或猶此意  
歟不然則昌黎所云亦足

以知其志之所存余固不  
知詩而輒舉一瓢之胸次  
孤清吐棄一切宿物故能  
俊拔乃如此益信晦翁之  
不我欺也一瓢方著詩話  
其以荒言為然乎否  
雖正乙卯三月初旬長洲

同學弟沈巖書於胥江二  
十四研小齋

吳郡李士芳鐫

斫桂山房詩存目錄

第一卷

樂府歌行九首

第二卷

五七古長詩十二首

第三卷

五律 八十一首

第四卷

七律 四十六首

第五卷

五絕 十六首

第六卷

七絕  
九十七首

斫桂山房詩存

河津薛雪生白

磨鏡詞

三尺菱花水一片背上葡萄穿海燕自從不作嫁時  
妝塵蒙難辨疑酥面殷勤持向繡窓前拂拭無言淚  
如霰青銅切莫怨棄捐心知妾貌同伊賤為喚門前  
負局人洗翳點永清光現重上紅樓理髮雲擠脂沉  
粉調香煎八字初分兩筆愁挽成隋馬安金鈿翠鳳  
搔頭玉步搖亭亭細影釵頭顫不信新妝勝舊妝侍  
兒爭向妝臺羨總教宜稱合郎心何由却得郎看見  
蔣侯神歌

金樽醉擲烟花裏戰罷黃塵呼不起蹴雨嘶風白馬  
來巫言今日神歡喜恭天古栢陰蒙蒙神來下馬歸  
神宮椎牛擊鼓賽明德不遣鹿蠻飛耳中願君莫與  
巫相迕巫怒能令神亦怒青溪夜月淨如霜樹上珍  
禽敢輕侮

俠客行

虬鬚火色樽前客腰下橫懸鉄三尺四海茫茫感一  
言傾囊便盡千金擲願我青衫血淚痕直前把手情  
難釋平生生意氣許誰是今夜別君誠可惜長嘯出門  
何處去風雨盤天斷行跡

神仙曲

玉顏金骨虛無裡，委翬雲鬟含貝齒。笑指三千一點塵，混沌曾看幾回死。鬱羅臺上醉流霞，阿母門前數落花。不管蓬萊水深淺，偷兒猶向人間誇。天闕重重真樂土，當關却用雙猛虎。青鳥無情去不來，茂陵松柏排風雨。

秋夜長

銀漢插天漏未央，銅龍淚漬搖餘光。小屏低髻對重碧，老桂露寒凝古香。含蘆勒鐵良家子，眠夢無憑一千里。高樓屈戌鎖紅銷，啼蜚弔月芙蓉死。

寶刀歌

為李耕夫作

冶出昆吾三尺鍊，神錘鬼鍛花千疊。激灩秋塘一鬢

光蠕蠕霧盡蛟龍血緬彼魚腸在何許心摧易水悲  
風烈豈知天帝醉瓊樓百二關河氣蕭瑟土蝕塵埋  
直至今鐔轡缺落誰相識咄哉李侯能好奇拾置床  
頭頻拂拭我來把視三太息却教四座無顏色會當  
乞取日摩挲鑿金鑿玉重裝飾寶刀寶刀莫羞澁掃  
盡橫塵青海側

### 市虎行

癸巳冬有虎自齊女門入投王氏園中數傷人城守率衆往捕益傷人不能獲召獵者四  
人生致之因作市虎行以誌其事

北風蕭蕭雪如掌城頭鼓角殺悲愴司寇遺園枕北  
隅荒涼久絕遊人賞園丁曉起汲池水獨繞寒林拾

斷薪忽來墻下見奇物眈眈危踞斑文身大殺擲地  
駭復馳連呼急欲居人知居人三告干城將雕戈駿  
馬來相向馬下健兒三百群昔為游冶今官軍平時  
盡號射雕手今當猛虎紛紛走不似擒生燒堠時競  
譟勅勒黃羊酒將軍奮怒如轟雷寶弓勁矢懷中開  
弓圓矢急傷虎吻虎怒傷人疾且猛吁嗟吾聞李將  
軍射虎灞亭下飲金沒羽誰能者又聞周孝侯射虎  
南山址翩翩著述世無比不聞猛虎入城市橫行一  
似空山裏虎兮虎兮汝何愚渡河高義汝不聞豐草  
長林無處無坐令泰山婦人哭未罷身與城狐社鼠  
同為倖

吳趨行

石井山房詩集

三

相逢吳都士為訝吳趨行吳趨昔全盛閭閻祥風盈  
勝麗固莫比冠蓋不可名斷髮化淳俗伯仲相與成  
德讓既藹藹文學猶崢嶸一自富春子奕葉誇豪英  
干戈擾東南半壁徒營營山澤本如此土風日以傾  
回波通桂檝繡閣連層城車馬競開都絃管飛新聲  
比來當壚眉在在遠山晴未語先回眸客子心怛怛  
舊闕無僂石袒跣千金輕照乘襟魚目野葛糲青精  
鮮履燦若霞繫以冠上纓往往屠沽輩意氣凌諸生  
不畏長官示何有嚴且清豈必長安少鄉里不敢撓  
我訝今日訝粗舉一二呈吳趨洵淑美請訝陸士衡

擊腕歌

風光澹蕩春意慵錦衾捲起雙芙蓉摘阮無心素琴  
冷映牕碧草新蒙茸堂堂白日易西馳眨眼落花繁  
斷絲擬尋蹴踘嬌無力欲上鞦韆遲復遲小鬟却解  
春光好促姊呼姨聞芳草不賸金釵及繡襦只拚擊  
腕恣傾倒因隨女伴出欄前散遶湖山踏翠烟擷取  
青青滿羅袖一枝一葉相爭先就中誰最稱擅場不  
數徐娘與謝娘靈運長鬚太飄忽洛陽明珠何足量  
捉搦春蔥將金釧玉腕拖來擊素練欲擊不擊笑語  
多指痕遙映紅酥面摩挲百遍怨輕狂那識旁人暗  
斷腸黃蜂抱蜜鶯哺兒問君何處覓春陽

斫桂山房詩存

河津薛雪生白

擬古

燦燦籬邊菊，嫋嫋門前柳。  
攀條傷遠情，採花露盈手。  
寓形復幾時，富貴詎能久。  
高風渺難躋，素心空自守。  
男兒棄紙筆，折腰未云醜。  
何為慕東臯，歸志樂南畝。  
蠶繅不成匹，豈麥不充斂。  
飢來無一辭，顏熱但俯首。  
慚愧白衣人，髣髴落樽酒。

採菊圖

緬彼商山人，抗懷入巖扉。  
牽荔結蔦蘿，浩歌發幽微。  
采彼皦皦芝，聊以充吾飢。  
斜陽隔林麓，莫莫將安歸。

有此柴桑翁千載繼清徽

和金廣文連城邨居六首

夙志任孤邁跡與林園疎攬轡倦脩塗言歸念田廬  
渺渺天際鴻悠悠江中魚敝襟託真賞舍此將焉如  
弱冠寄琴書晨夕饒真趣脫身貴不羈金閨豈足慕  
何為入風塵始覺釋世務幸我終耦畊與君一壺素  
空翠濕南山時苗被廣陌振衣激清嘯俯仰欣所適  
濁酒奉高堂清月下簷隙投簪會素心自茲謝行役  
托跡近淪隱衡門絕車馬日夕坐鳴琴悠然自舒寫  
豈無脩綆懷誰與汲古者緬彼柴桑翁東籬菊盈把  
草堂有佳氣古木多餘清獨坐一卷書契此千古情

中夜夢通衢結念屬友生稚子歛相報時聞叩柴荆  
飄然賦招隱曳履青山阿閉門塵事冥矯首風雲多  
踈林發清響潦水澄寒波相期阻邱岑臨風惝浩歌  
送春日同人至香山小飲

香山韞奇秀終歲無攀緣俯視七十峰自與沆瀣連  
高下走蒼虬數里猶蜿蜒怪石踞虎豹幽谷溜寒泉  
頻過未登陟指點由長年風花日將暮相率來湖邊  
携榼就靈境一攬雲山偏穠春付蕭瑟幽意或可全  
從游不能俱獨上危峰顛四顧鶻然嘯驚濤掀遠天  
雙屐難久竚歸飲蓬窻眠酒醒春亦盡客去心茫然  
登穹窿絕頂望震澤

飽聞此山勝，翠峰城西角。吳儂不愛山，山靈氣蕭索。  
頽我冷淡人，天教近林薄。短筇挾芒屨，遑恤勞兩脚。  
振衣磅礴間，奮步上躡躡。舉手捫青天，四顧恣嘯樂。  
白波何浩淼，捲起向身落。中涵七十峰，箇箇巨靈削。  
栽栽兩高山，相對話然諾。烟汀渺難渙，鏡裏蛾眉怍。  
腋下無清風，安得駕黃鶴。泥彼古仙人，於此採靈藥。  
幸吾事幽討，脫身或可學。何必向子平，乃能卸羈絡。  
辭元和李明府聘應博學宏詞書幣代啟十六

韵

結廬太湖濱，湖光清且倩。沙鳥共忘機，臨流伴滌硯。  
采樵上白道，常恐衡門宴。依依嚙指心，望望南山眩。

尊羹滑於醅鮮鯽膾如線自歌太平曲供我高堂膳  
欣然午飯飽含飴甚留戀不聞車馬轂無由異所見  
麟鳳在郊藪頗足稱國善何須列苑囿始作休徵眷  
況茲樗散材難就繩斤變顏闔果可求申詳亦堪羨  
雨露本無私山林久濡徧一言感君意刮此風塵面  
無柰泉石間烟霞日相纏請馳尺素書羅取珍竒薦  
競渡

五月五日江水翻江上聞聞金鼓喧蘭漿雲旗不相  
下帝子孤臣各斷魂一片殺歌歌不起沉寃只在清  
波底拾取鮫人血淚珠綵絲織入離騷裡

斫桂山房詩存

河津薛雪生白

野望

獨立平堤晚南山當前樵歸空翠雨霞襯夕陽天  
樹樹含風老村村傍水偏微吟移杖屨古戍起炊煙  
震湖送春

去矣渾難住來應未易招一違成隔歲相望自今朝  
燕子啣初破湖光蕩欲消從茲判醉卧眼底已無聊  
經鋤堂賞牡丹即事分韻

得魚字

幾度花前醉重來小雨餘敲詩聽玉漏貰酒愧金魚  
色借當筵燭香分座客裾他時雙屐健隨意到經鋤

和梅岑立秋前一日坐雨山齋原韵

地僻煩囂遠，衡門掩翠微。  
雨深蛩自咽，梧淨葉初飛。  
捲幔山當座，憑欄風滿衣。  
浮生行樂處，舍此欲何歸。

中秋月

不是秋容澹，誰憐此夜明。  
多因十分滿，倍覺九霄清。  
碩兔影猶濕，棲鳥夢亦驚。  
笙歌與砧杵，一一自含情。

輓閩中吳烈婦

聞有數語遺孤

之子何為者，儀型亦可人。  
一時成素義，四海仰明倫。  
白日寒孤淚，青霜潔已身。  
斷絲和截髮，此意重難陳。

送郡司農竹山王公仲子泛海還閩

把臂情方洽，言歸歲又違。  
歌終千里別，風滿一帆飛。

閩海渺征雁吳山澹夕暉  
相期叢桂發貰酒候柴扉  
一樽纔破臘千里去逢春  
島嶼回頭換風雲過眼新  
清時方下士家國莫羈身  
況有庭闈念音書肯惜頻  
辛亥守歲

世人憐好夜我意重今宵  
歲月從茲去風花空自饒  
瓶傾椒醕盡爐冷栢香消  
共就團圓坐朝暾上綺寮  
期鹿山中丞小莊看梅未  
至時而阻玄墓

為問東西崦何如此竹開  
寒香原有約結驕幾時還  
仰面看雲久巡簷盡日閒  
莫愁風雨惡爽氣滿南山  
陪鹿山中丞同李明古袁  
籲尊游西山

共上籃輿去言尋雨後梅  
遠山迎面起野鳥觸人來

俗尚仍相問風光暗自催應劉俱向老銘繫日追陪  
初夏即事和蔡僧摩韻

風光隨意好景物豈全非燕趁芹泥遠鶯捎花雨稀  
醉眠榆莢暗閒拍柳綿飛長日真堪愛高堂試薄衣  
閏五月五日

本是沉寃日歌招又一番巫咸能下問賈傅渡何言  
香草新離思江花舊淚痕行吟人不見孤影立黃昏  
約青原和祁正名韻

聞道城南勝清幽自一鄉草分門外路僧定竹間房  
樹果因風落簷禽畏客藏幾時游咏去共汝立蒼茫

落花

和汪山樵

命薄因風墮寧隨柳絮狂已添蛛網色又與燕巢香  
點點侵書幌紛紛下苑牆斜枝吹不盡宛轉入閒房  
讀南史偶作

鷄人傳促漏華燭正當筵星曉重開鏡香沉更沃煎  
詞臣歌玉樹傾國踏金蓮萬古青溪水遙通井底天  
早行

不信烏猶宿曾聞鷄既鳴朝暾迷海角殘月掛春城  
去去之何處垂垂愧此生翻疑時向晚愁絕遠鐘聲  
月夕

蟾淨銀河沒心孤玉漏殘那知千里隔不共此時看  
衝瓦金波動搖窓碧樹寒只應添悵望豈是恨團圓

贈山梔花

脈脈隔簾窺難勝泣露姿香判通夢寐色不尚胭脂  
肯結同心苦寧辭入骨思栽培愛嬌小頭作有情痴

夜雨

攪夢亂無緒開花辭故枝關心真似搗鷺髮欲成絲  
莫向燕鶯日便連櫻笋時披衣坐中夜愁聽滿前墀

送友

遠客相逢少何堪又別離莫輕年少日判作老來期  
去去一樽酒垂垂空柳枝月明江水濶應照兩心知  
繁花照眼明花下送君行水陸無通跡舟車始不征  
潮聲鄉國夢山色故人情若憶同遊處應思春草生

新綠

為惜繁華盡爭憐黛色新一宵判瘞玉幾樹逼殘春  
別館愁無主高樓夢正頻蓬山千萬里遮莫隔紅塵  
寄懷吳侶鷗席湘北玉照

去年三月暮乘興作春遊有客誇青髻多人羨紫駟  
好花經眼盡勝事逐時流今日沉吟裏誰憐獨倚樓

題春郊試馬圖

為陳求古作

名士情真逸龍孫少獨高何人知絕影聊爾示同曹  
骨駿銅駝越星寒劍氣豪願珍千里足一待九方臯

哭陳求古

望江為龍所傷

誰遣無端死難吞痛絕殺去家曾幾日沉水竟殘生

少婦紅妝在高堂老病成如何輕一別此意不分明  
共惜才華美偏憐向綠樽死生原定分慘酷更沉冤  
愧乏澹臺勇難招正則魂求古酒後為江  
龜所傷故云祇應江上  
月常照泣黃昏

施氏林亭避暑寄林進士松址

有地堪消暑林塘曲逕通坐來山色裏時在鳥聲中  
竹淨初過雨荷欹半著風此間幽意好早晚與君同  
葛稚川丹墩

丹成人已往此地有丹臺萬古雲常護千年鶴不回  
波濤憑吐納煙樹獨崔巍吾亦餐霞久何時歸去來  
武山閣避暑同蔡僧摩作

觸熱誠何事煩襟苦晝長呼童尋僻地有閣瞰重岡  
踈磬落人境暗風吹客裳炎魔渾不墮相率入清涼  
贈武峰隱者

落落逃名客冰壺貯素心浮雲經眼淨高卧此山深  
檢點惟園果棲遲近竹林有時入城市賣藥與脩琴  
過翠峰寺阻雨

不問前村路看山信馬蹄偶過黃葉店行盡白沙隄  
歸鳥飜風急重湖隔雨迷無窮縈望眼惘惘坐招提  
病中留別武峰隱者

山徑今重過無端卧病身微君能絕俗知己屬何人  
園果時相贈清談亦慰貧明朝湖上別把手定傷神

對菊

已惜花時過偏憐菊自新輕香霜後盡舊摘酒邊人  
老去思芳實狂來倒葛巾悠然成獨賞陶令是前身  
花下醉

坐卧穠芳裡何辭更後杯香浮心漸冥日薄首重回  
細數愁春判頻傾任客陪吟成濡短髮題石掃莓苔  
許心逸期飲葉氏凌蒼閣主人堅局不納而返  
逸興追龐老來乘小閣空思將山對酒不覺事如風  
人世本無定仙源豈易通明朝揮手別一醉與誰同  
艾虎

蓬筍憑結束看取亦雄奇敢蹈編鬚險真成履尾危

文章應自惜牙爪欲何為萬物皆芻狗猙獰得幾時  
舟過嘉禾道中為津吏所阻剪燭遣悶

剪盡蓬窓燭寒深夜未央沉憂人易老多病學俱荒  
歲晚歸應急時艱道阻長何當求負郭餽粥奉高堂  
客夜

旅枕愁無寐殘燈向壁明幾翻辭樹葉亂作打窓聲  
迢遞縈鄉思淒其念友生雄心孤劍在難割此時情  
歲朝春

正朝風日好盡放早梅開忽覺禽聲異真知節序回  
一天新雨露萬象自胚胎野老徵豐稔屠蕪滿舉杯  
新柳

春日河橋路絲絲帶野塘鎖眉勻半翠偷眼弄疎黃  
拂水猶無力臨風已斷腸那堪經惜別幽恨倚斜陽  
殘梅

何限飄零意栖栖獨愴神夢回無奈月影靜不禁春  
官閣從欣賞空山自絕塵誰將幽恨淚一為灑芳辰  
訪隱

蠟屐遠相求柴門對碧流獨穿松徑滑高卧草堂幽  
樹老花蠟忽窓虛竹掃愁坐深瓶鉢靜童子亦閒鷗  
羨君棲遯處不厭數相過落几層嵐秀繞門秋水多  
一瓢涵日月十笏具山河為問長安陌何如此薜蘿  
得家書

一緘初落手萬慮暫離心細檢封題遍綠知意念深  
青山在何許白日坐消沉依舊臨風淚泫泫滿素襟  
聞不倚病

書來聞汝病驚我客心寒每念親頭白還憐子影單

次兒汶  
初喪

一經期不墮兩世賴承歡家兄  
無嗣飄泊歸無計

勞勞春又殘

### 夜泊京口

只擬輕風便歸帆去似飛誰知回望眼依舊是羈棲  
月赴江流湧天隨沙岸低寸心焦欲盡坐聽五更鷄  
東山鄭氏園林五首

聞道紅酣處春深繫客思微風歸燕晚疎雨落花遲

搖壁流霞散侵燈曲幔垂翻嫌陶靖節寂莫咏東籬  
紅酣處

日涉園成趣閒深樂有餘酒醒山月上碁罷雨花初  
卧石調歸鶴憑欄數沼魚自茲觀物我天地一蘧廬  
樂閒堂

可怪如簧滑生生動客情原知無正始悅耳即成般  
斗酒君常貯雙柑我暫聽把茆如可託應許結鷗盟  
聽鶯軒

竊窬吟香室吟成香更多芳蘭吹不歇秋菊淡如何  
谷口曾相識籬邊許暫過名園幽興劇遂欲醉高歌  
吟香室

列岫青何極迢迢接太空而歸平楚外雲淨小窓中  
潤落殘書蠹清涵古木風不知披覽客幽思與誰同

霽碧樓

瞻園五首

園為徐中山故第

如何堪下拜自是獨超群遺世披蒼蘚安心卧白雲  
九嶷勞指點五老漫區分泰岱千峯秀峰峰不似君

石丈

峯

舉手發長嘯臨風絕世氛蒼茫成獨立氣象未全分  
蹴破一天碧携歸兩袖雲祇因憑眺後眼底總紛紛

觀星臺

疊石破山色移花剗徑栽遠來惟細柳無處不層臺

結搆何年就滄桑亦可哀園林今日好又為一人開

移山堂

歷盡峰巒秀重開一面山振衣臨絕頂長嘯有餘閒  
落日下塵世秋風吹我顏留人多遠岫故故似青鬟

來青閣

堅貞聊自許屈曲肯求伸不入工師手終全臃腫身  
飽經三尺雪懶競一時春錦里森森栢何如此絕塵

梁個檜

### 睡起

睡起虛齋下人閒思更重烟沉芳草暝日午杏花慵  
落砌風承蝶衝簾燕趁蜂昌昌春物好只是送無悰

搗衣

悲風送涼露含淚理寒砧塞外歸無日閨中盡此心  
不辭雙腕脫豈惜一宵深常愧荒鷄誤空驚戒旦音  
秋夜漫成

涼風收宿潤窓下素琴橫疎影落簷際空林淡月生  
畧聞幽籟發殊念故人情長嘯不復理相思夜正清  
贈李博成

詩如青蓮書如北海坐賦事陷獄

狂客今何在如來空後身百年乘間氣四海獨清新  
嗟爾淹留劇將余遲暮均可能吟髮短俱是不如人  
花塢夕陽遲

花重春風暖村幽化日長就沙鷗卧穩得草燕歸忙

藹藹凝空翠融融度野香此中真太古別似有流光

離思

心折橫金鎖腸迴動玉鉤栽詩梧葉院夢雨酒家樓  
陌上野風急門前溝水流斑驪何可望道路阻艱脩

荷花

羅襪淩波出妝成玉鏡中生香涼月露弄影野塘風  
葉重因連碧花嬌各自紅何人設瑤席應許一樽同

涼思

荷欹池館靜幔卷夕陽輕雲向天邊薄風來竹上清  
已判遙夜夢更怯暮蟬歎回首憐孤鶴秋宵只自驚

客中

昔時輕一諾此日悵無端豈有安危繫空教進退難  
艱虞違負米汗漫悔投竿滿眼林花好春風吹已殘  
寒食

客裡逢寒食風光倍可憐幾人同話雨訴酒惜流年  
蜨墮花間粉鶯梳柳外烟故園歸便得低首強留連  
返照

日脚明如許閒雲淡欲無薄涵平楚合低映遠城孤  
不盡群峰影還開半壁圓歸人覓魚艇招手一相呼  
白土鎮逢朱南湖使君

使君來白下詞客向朱陽把手談移日居人駭欲狂  
如何殊貴賤相遇契衷腸車笠從教見方知刺史良

留贈句容魯綺園明府

名邑湏賢令仙都在部中牛刀聊小割鳧舄有真風  
膏雨村村遍絃歌處處同不妨成卧理可怕病魔攻  
贈句曲醫者張毅可

斯道久寥落逢君此擅場山中無外史市上有韓康  
紫朮勞相寄黃精許更將遲余雙屐健來共入華陽

題瞿鐵峰淬劍圖

余先有磨劍圖與此相似

吾亦曾圖此深衣戴竹冠看將三尺水磨向萬重巒  
鋒鏑初相似光芒尚覺寒不教成小利輕試與人看  
雨後訪汪山樵不值

聞道投簪客相依在此間不辭雙屐滑來破片時閒

葉積林中逕雲封屋後山伊人在何許高跡杳難攀

送姚梅岑赴句曲魯明府幕

梅岑工書善醫

翰墨得薪傳丹爐火候全向來名譽早今日主人賢  
籠貯神仙術囊分官俸錢此行殊不俗慎莫廢詩篇

歲暮御調卧病因憶梅岑

時梅岑在句曲幕中

歲剝無多日愁添百尺長影孤慙素壁錢去念空囊  
而弟貧兼病嗟余老更狂哀鴻終夜起最憶是他鄉

寄懷郭月川并答來詩

月川與余同客武林幕府

幕府多名士惟君最賞音離亭一樽酒知己半生心  
夢到孤城遠詩來客思深何當重把手袞袞共追尋  
送榆林憲副吳瑾伯入都

君攬閩山秀，吾棲吳市塵。如何一傾蓋，遂覺久相親。  
出處雖殊迹，艱虞各愴神。旌旄重把日，莫惜鴈書頻。  
落葉

物候嗟無據，飄零謝故枝。庭虛終日捲，風定一聲遲。  
不耐閒窓晚，真成午夢思。誰憐吟望客，霜鬢苦低垂。  
暮春晚霽登靈巖寺

小雨初收脚，光風轉綠陰。雲歸群岫暝，花盡一村深。  
遠到林間寺，都將物外心。欲從晞短髮，無奈夕陽沉。

聞翁蘿軒凶問哭寄德柔朴存

德柔蘿軒甥  
朴存蘿軒姪

豈值龍蛇厄，長星隕碧天。名場堪一哭，大雅更誰賢。  
日月終無據，魚書杳不傳。西州多感遇，特地問曇玄。

石湖納涼喜值雷雨

放舟沿柳岸頻轉就陰森  
漉酒從人勸臨風任我吟  
好山都在眼歸鳥亂投林  
農務需時雨為霖愜素心

斫桂山房詩存

河津薛雪生白

柳絮

點點飛過曲檻前  
輕于粉蝶軟于棉  
亂翻花雨飄飄起  
遠逐烟絲滾滾聯  
乍去乍來渾不定  
無根無蒂倩誰憐  
也知總有沾泥日  
莫趁東風太放顛

章尊師自供奉歸留宿洞虛宮夜話

兩袖嵐煙入帝鄉  
七年清醮禮虛皇  
蒼生盡沐團雲力

師曹奉  
詔致禱

詞客寧無換骨方  
口業已如鷄斷尾  
塵心

還證鼠拖腸  
何當署作神霄吏  
願執霓旌侍玉房

同人約送春雨阻不果因寄敏中

淡紅輕白付橫流。天與王孫惜浪遊。幾日愁判花下  
遣一宵春自雨中休。難拋心事屏間曲。直斷吟魂柳  
外樓。聞道吳山芳草裡。今年香色又孤邱。  
敏中亡姬  
葬吳山

瓶中牡丹

剪得雕欄艷一枝。畫屏羅幙護瓊姿。貯成碎錦穠開  
日。賞盡含苞未吐時。仙質祇因詩可擬。異香那許蝶  
先知。長安池館笙歌裏。處處殘紅付酒卮。

海虞山水以錦峰為勝。余去此幾二十載矣。丙  
申春席渭南對揚。昆仲招遊。竟日有感往事。

廿年重到錦峰頭。山色依然翠欲流。淡淡風光來杖  
屨。殷勤花鳥自林邱。欲知倦眼經春放。正想何人載

酒求世事只今真衮衮他時誰更共遨遊

謁岳王墓

北伐旌旗捲大風中原父老望神宮精忠兩字留青  
史碧血千年報犛童自是人心輕社稷非關天意困  
英雄無窮南渡興亡恨盡在書生一拜中

幽齋

戲效劍南翁

靜覺幽齋事事宜別開窓牖為臨池矮花嫵媚真堪  
嬖瘦竹孤高亦可師境到眼前憑我選詩傳身後倩  
誰知近來添得閒滋味坐看牆陰日影移

丙戌除夕

瓦鼎憑將栢子焚團團圍坐夜初分細繡時序占新

而暗減餘年付舊聞。勝事誇人親健飯。美談泥我子能文。鵲原有恨憑誰訴。一載淒魂化白雲。

因念姚氏先姊故及

壽朱尊師

手攀北斗挹流霞。醉撼天關月半斜。世界三千幾甲子。因緣八百一龍沙。妖虹圍就雙丸劍。火棗翻成五色瓜。不是我儂知箇事。芙蓉城裡舊同家。

九日書懷

生憎物候易蕭騷。又見茱萸綻遠條。黃葉黃花仍故事。秋風秋雨釀今朝。詠籬有客追遊賞。寄酒何人慰寂寥。賴是微吟消遣得。不教霜鬢逐時凋。

醉吟齋

為毛懷士作

縱橫十笏着青氈閒便微吟醉便眠消受春光長似  
歲破除愁境大如天琴書老我真知己花月逢場盡  
可憐何必雲山尋洞府紅塵不到即神仙

春郊

出郭常愁花不開花開今日自徘徊亦知柳眼惺忪  
極無賴鶯聲次第催落日牛羊原上草側身天地掌  
中杯紛紛共遣風光盡雙屐還能更獨來

芭蕉葉上三更雨

翻風鬧雨動離情兩鬢頻催白髮生孤館懷人正愁  
絕城頭擊柝復分明驚回遠夢淅淅密滴破鄉心點  
點清況是背窓燈半炷捲來都是斷腸聲

懷友

年少逃名碧水濱  
荻花葑草亂紛紛  
慙無絕世烏絲筆  
來寫高眠白練裙  
盡夜低回頻對月  
終朝悵望只看雲  
何時剪燭虛窓下  
共踞胡床細論文

送豫章劉鍊師

淡蕩襟期少定蹤  
草衣木食亦春容  
來衡雪浪春三尺  
去踏雲山秋萬重  
見說壺天輕一別  
可知塵世重相逢  
若教此後能回首  
好寄詩人縮地筇

長洲懷古

半面湖光萬頃清  
周遭山色不勝情  
採香有逕芳蹤絕  
並蒂無蓮春草生  
一片亂鴉風攪樹  
數聲殘角月

低城枉勞孫武誅紅袖畢竟還因歌舞傾

病中贈牆南小桃

春日猶憐阻絳羅清秋卧病復如何根蟠露井情無限  
花落吟窓怨幾多此日風前同索莫當年洞口自婆娑  
如何不遣劉郎住水到人間便隔河

戲贈瞻園海棠

冶與夭桃瘦與梅暖香幽艷總輿臺無人可共風前笑  
有夢難從月下來絕世自應卿薄命清時只合我非才  
相憐盡在相看處一樣春心未忍灰

燈花

焦盡春心淚暗催火輪中現妙蓮臺擎來芝蓋皆成

幻散出天花半未開  
蜨粉乍消羞照影  
猩紅既墮莫重栽  
憑呼小玉添蘭露  
只恐穠纖一霎灰

清簾踈簾看奕棋

幽齋長日絕風塵  
局外偏宜冷眼人  
一着爭先防失手  
兩生勿斷是謀身  
茶烟不動中心熱  
梧竹無聲四座頻  
笑到枯時機亦盡  
何如高卧樂天真

欽笑凝眸意欲歌

擬向尊前試遶梁  
愛將宮徵細籌量  
如逢薄怒初消遣  
偶露閒情又諱藏  
鶯囀何須勞想像  
神人原是乍陰陽  
綠知芳草天涯遍  
未啟朱唇已斷腸

芙蓉

晚烟為珮水為裳掩映江干小苑旁已辦紅粧驚俗  
眼尚留青骨拒繁霜落時不逐漁郎棹開處應遮玉  
女房何事秋風摧錦繡只教低覆野鴛鴦

哀箏

吳絲高激鴈行斜腸斷沉沉繡幕遮萬里清笳吹夜  
月數聲長笛落江花蛩驚曉露偏多語鳥繞南枝未  
有家盡是不堪親切聽峽猿啼處更天涯

溪居別業

傍水荆榛手自開竹間花裡半樓臺坐中圖畫真奇  
絕檻外風濤亦壯哉僻徑從教人誌去素書只許鶴  
啣來桃源好在烟霞鎖不似昆明有劫灰

聽箏

十二青鬟已解愁十三絃索似瑩簇穿來泉客千行  
淚驚起霜鴻一片秋促促暗移金粟柱泠泠輕卸玉  
搔頭柔腸判向樽前斷銀甲從教著意勾

硯

採玉常愁湏水寒端溪片石出猶難斷殘琮璫雲初  
散注罷虫魚墨未乾別殿捧來供係值一時宣賜寓  
周官美人芳草多騷思凹盡中心也自安

客懷

一葉輕舸渡渺茫青山如舊黛痕長即看風景又秋  
日何必萸鱸是故鄉詩到感懷隨手就事當把酒暫

時忘此情好與誰相悉孤枕蛩聲送夜涼

將還村居留別城中同學

戲微廉節體

拋却安居遠郭門把茅結屋住孤村綠知世事都如夢甘向清時老灌園點對風花從嘯傲料量晴雨是操存譏彈不到忘機客只負生沾水土恩

草

一點子性近野逸身無羈檢結處震湖之濱學稼硯山之麓空翠落楹間雲封戶偶因賣藥竭來城市憂賦春草用代擊壤

一自王孫去不回望中平綠鏤塵埃旗亭日薄歌聲咽金谷花飛夢雨催老向開河瞻魏闕愁經野燒過龍堆青青重遍天涯路昨夜春風捲地來

晚秋漫興

風光何處好憑欄片片浮雲作暮寒鳥雀漫喧爭集  
粒魚龍高卧任狂瀾籬邊黃菊猶堪把屋後青山儘  
耐看酒熟詩成無箇事紛紛眼底付摧殘

經鋤堂賞牡丹

自有奇姿肯浪開繁華銷歇始登臺吟成筆點珊瑚  
架醉後謔傳碧玉杯金谷纖塵風乍轉綺窓朝日夢  
初回豪家池館穠于錦零落何人感舊來

棟花

柘岡西去杏園東幾樹穠姿擬不同開日已遭三月  
暮落時須盡一番風多羞巧笑傾南國真愧無言冠  
楚宮細把重吟雙淚亦依然花葉屬天工

落花

幾日春光一夕秋風前惆悵雨中愁香銷金谷魂初  
墮怨入琵琶淚暗流一片飛來纔小苑數枝連去又  
重樓傷心芳草粘天碧葬盡紅顏卒未休

流鶯

金梭織盡柳絲長不逐烏衣上畫梁出谷一聲纔悅  
耳臨風百轉最回腸夢殘孤館月初墮人去旗亭草  
正芳但得雙柑和斗酒鳳城南陌總春光

睡燕

誰憐辛苦為巢忙斂翼垂眸倚畫梁瘦影已隨身共  
息倦魂無復語生香清宵華屋藏春暖白日游絲引

夢長我亦年來心力盡看伊默默感中腸

茶仙

茶中淨梗俗名茶仙人卜來客甚驗

疑他七碗玉川生千古精靈幻化成豈有衣冠聊具  
體漫無揖讓濫虛名浮沉自分驚蓬轉漂泊誰憐泛  
梗輕可是清風生兩腋一漚天地任游行

醉後

醉後狂譌醒後悲逢場便是斷腸時衫袂已滿窮途  
淚篋稿寧無感舊詩性不因人偏自冷情何多事為  
誰痴摩挲兩眼看陳迹白日堂堂空所思

籌筆驛

一語親承顧命時常將勝負此沉思山河已定三分

局吳魏終成未了碁自是天心移舊德非開王佐竟  
無為只應白帝城頭月曾照孤忠血淚垂

春夜聽雨不寐

斜趨東風斷續翻虛簷庭樹共成喧驚回雞塞迢迢  
夢銷盡巫娥黯黯魂匝路染開芳草地隔溪洗出杏  
花村無端竟作平堦勢直浸寒燈影欲昏

苦熱

何時高卧傲羲皇老去難勝襖襪忙白鳥有聲偏宛  
轉青蠅無賴更相將急思雷雨來何晚強對衣冠悶  
欲狂赤日亭亭真可畏不知誰地是清涼

留別蔡僧摩

半壁當年同托跡把茅今日各衡門  
常懷夜讀燈火無復閒牕數晤言  
對酒知君招客共著書老我向誰  
論雲中雞犬離群後惆悵人間有  
舊村

游白雲洞山行口占

一路幽光愜素心杖藜引我赴招  
尋風來細柳枝邊軟雲到重山闕  
處陰清淺寒流沿斷岸澹黃斜日  
下疎林殘毒猶作穠春思點點飛  
香上客襟

贈東峰逸老

繞屋雲山儼畫圖閉門終日著潛  
夫機心消盡無新語塵事都將付  
舊徒看竹尚餘雙屐健登山不用  
一筇扶廿年城郭無行跡肯信人  
間有畏途

結廬山中瓜涇先生復用歲暮原韵見贈有終

望韓康入市來之句依韵奉報兼述鄙意

無端聚散首重回心力於今已半摧要使兒童知稼穡  
肯同燕雀傍樓臺薄勞自劬花成逕閑課還蒸秫  
作醅得句有時尋舊侶埋名賣藥入城來

題友人書館

憶君芸館坐無聊及至來看更寂寥橫案琴書塵漠  
漠暗牕竹樹影蕭蕭徵譌夜醉誰家酒結隊朝過第  
幾橋分付時光好相待桂枝湏為長千條

過某氏園亭

醉裡風光憶此園泥人多半近黃昏屏間按曲聲難

諱座上焚香意共溫  
輕趁飛花輸鳳子  
暗穿虛牖羨龍孫  
而今重覓留題處  
零落當年舊墨痕

斫桂山房詩存

河津薛雪生白

摘桐葉

呼童摘桐葉莫使及高秋  
秋來風雨多點滴是儂愁  
控鶴亭

一徑穿雲外峻嶒俯翠微  
何人來話雨黃鶴繞亭飛  
昭君

事本安黎底情應斬畫師  
君王非重色不欲毀天姿  
小松

盤屈巖阿裡無人為剪裁  
安知深雨露不作棟梁材  
石榴

何事嗜甘酸楚楚值牙齒纖手破輕明含笑看多子

吳塔歌五章

嶺上五粒松海底一尺珠同生不同死況復說相思  
願作水底魚不為岬上山誰將鐵如意打斷玉連環  
雄龍澗下眠雌鳳雲中搏脩鱗與紋羽亦自有摧殘  
本是吳宮花春風忽吹折掩面看花人血盡中心熱  
朝出齊女門遙望淚霑裳日夕自歸去秋宵更漏長

短歌四章

醺我樽中酒聽我座上歌憑君問來意此意當如何  
抽我架上書拔我床頭劍銘槩漫成塵清光鎮如電  
張我腰下弓調我箠中矢與君一石飲殄盡南山兕

脫我塵中衣放我湖上舟相期抱明月歌哭卧橫流

夜雨

明滅殘燈下蕭蕭枕上殷惜花和惜別難辨此時情

憫農

婦子同胼胝公私望有年心知飛輓急不敢怨蒲鞭

斫桂山房詩存

河津薛雪生白

題陳鐵肩黃山紀遊圖

峯上層峰山外山何人不怯此躋攀那知世路尤奇  
絕一步崎嶇十座開

貼紗梅

出自閩人所製

幽姿應趁錦叢叢粧點名花綽約同記得月明林下  
見直深雲髻碧羅蒙

莫捉如珪掩淺顰此中花樣更精神淡妝濃抹休相  
絮一片新裁昵殺人

鄭玄塚畔花成窟蘓蕙機邊錦作叢剪錦作花花似

石木山房詩集  
錦緣知金剪是春風

訪山中友人用壁間韵

滿逕重陰滿樹風水散鳥語夕陽中  
長年境界君偏得遠為丹砂笑葛洪

芭蕉扇

北窓得句坐移時題向芭蕉寄所思  
誰道團圓似明月清秋羅袖不相宜

剪取芭蕉破綠天裁成團扇寄嬋娟  
莫言水閣無炎暑有客騎驢更著鞭

送友人從軍

鋒芒銷盡此心平剩有閒吟過一生  
那更送君驅馬

別鐵衣如水鴈翎橫

懷友

布帆高掛楚江天  
春草吟成夢阿連  
萬里河山經歲別  
奚囊添得幾詩篇

討春

何處討春春不群  
水邊芳樹倚斜曛  
柳嬌花艷鶯聲滑  
共釀春光到十分

題竹間小閣

為愛林泉卜築奇  
竹間小閣瞰深池  
就中別境無人會  
檻外雲山似虎兒

一載曾經五度來  
不知此地好亭臺  
把茅若遂他年

約日過樓頭坐一回

客窓懽感

花花草草亂縱橫  
盡向春風浪得名  
今日客窓看已遍  
不如歸去聽啼鶯

囊漸空時僕漸驕  
朝來贏得是無聊  
阿誰饒盡豐干舌  
誤我淮南大小招

題天女圖

為問維摩病裡身  
輕盈風調越清真  
書生結習從來淺  
莫舞天花亂著人

病中聞李子博城將歸燕都

半生骯髒落紅塵  
刮目逢君賞鑑真  
我正病來君欲

去江南風雅付何人

題像

展卷驚心仔細看  
水邊林下覓人難  
如何却有忘機客  
箕踞松陰耐歲寒

盆梅次韵

衝寒懶向灞橋游  
小盎栽培亦自幽  
只恐茅簷低亞慣  
更無春色到齋頭

庾嶺開時是勝游  
南枝香暖北枝幽  
盆中莫恨無多地  
但得春風便舉頭

麥浪

暖風吹我上東臯  
滿眼漸漸低復高  
鳥語喚人行不

得也知平地有波濤

疊韻荅朱晴川

眼底烟雲柰若何  
愁來絮語醉來歌  
卷中新句輸君好  
唱入旗亭畫壁多

題周濱鷗清溪集

老盡鶯簧墜粉紅  
周郎應只怨東風  
聲殺字字啼鵲血  
半是青邱半放翁

賈生

老我文章亦主恩  
不應遠弔楚沉魂  
無端痛哭原非分  
聖世遷臣豈有冤

前席曾蒙異數新  
何妨鵬鳥上承塵  
天家雨露沾濡

遍只合書生論鬼神

垂釣

日日磯頭理釣絲何心輕作帝王師後車一載終千古不得烟蓑更着時

蠟梅

何事花容帶病容了無脂粉媚春風年年開落冰霜裡虛費天家化育功

春愁

閒庭苔樹綠重遮紅漲池塘滿落花底事春風吹不盡五更和雨到窓紗

七夕

止隔佳期一水長  
經年待得渡微茫  
五更卽有千聲漏  
肯為人間乞巧忙

送友人之瀾

前值涼秋後值春  
扁舟西渡瀾江雲  
閣門遠近無楊柳  
底事迎君復送君

真娘墓

草色青青鏤野塘  
登臨人自憶真娘  
魚腸霸業誰回首  
半在笙歌半夕陽

乞茶

賣餠時節困人天  
當戶遙飛玉乳泉  
料得山翁成鳳餅  
破慳為我寄花前

答問

道服禪心居士身吟殘秋月醉殘春當來姓字如相  
問八百龍沙會裡人

竹

嘯雨寒稍百尺長渭濱千畝壓瀟湘柯亭一節尤堪  
賞不是哀猿亦斷腸

聞琴

沉沉殘月浸牕紗落盡江城五月花莫為清音費辛  
苦此中無曲似琵琶

柳

絲垂百尺同心帶葉展雙分驚翠眉見說章臺無定

性秋來亦解減腰肢

歲云暮矣觸緒興懷率成短章

日高堅卧苦吟身何事柴門剥啄頻耕石自無催稅  
吏世情誰送雪中薪

更檢方書仔細看了無一法治飢寒非關桂玉心偏  
拙悞我浮名歲又殘

踪迹難容恩少兵疎狂吾已負吾生誰將司馬江州  
淚一哭中原禍正平

孤山梅

粉隊脂行盡出群就中風度獨推君從今若夢西湖  
雨定繞孤山處士墳

葑山觀荷

水遠山明白日長  
翠翹紅袖競新粧  
樽前有客狂無柰  
一挹餘香一斷腸  
一插青峰一朵花  
峯峰飛翠映朝霞  
夷光去後渾無伴  
多少紅顏老若耶

金牛嶺

雨後看山面目真  
峰峯如沐黛痕新  
尤憐嶺下清溪水  
一路潺湲似送人

題李翰林集

稽山痛飲憶相於  
淪落江湖三十餘  
一個詩人容不得  
思量造物漫空虛

慕慧士崇士昆季南宮同捷寓蘭賀之

聯奪宮花並繡鞍一門雙妙萬人看山癯見獵心猶  
喜特寫春芳寄二難

閏五月五日

重來江上酹流霞再拜休將獨醒誇若使當年聽漁  
父不應更有賈長沙

金絲桃

花飛燦燦葉幢幢萬縷愁絲未可降崔護不來人自  
病淡黃容色倚吟窓

柳

江南陌上不勝垂舞破春風歛細眉已是行人腸欲

斷月中羌笛莫頻吹

舊將軍

男兒誓欲斬樓蘭射虎雄心未肯寒莫怪潮陵逢醉尉而今咫尺路行難

聞歌

不是哀猿與嘯鶯暗風吹落更淒清天涯芳草堪腸斷何必陽關幾疊聲

曼倩辭

金馬門前十丈塵西來青鳥又何因君王但聽詠諧好不道偷兒是近臣

遣悶

傷盡春光悲盡秋百年強半尚林邱  
心知栽柳還栽菊絕勝黃州又惠州

商於

千古江山似奕碁無心割地笑張儀  
而今尺寸歸王土秦楚何曾有舊基

題李允凱觀潮圖

憑將萬弩射洪流半壁英雄十四州  
今日江干舒冷眼濤殺空撼鎮東樓

舟行晚興

處處蘆花捲水痕家家黃葉掩柴門  
丹青安得倪迂手畫出江城烟水村

陶彭澤

出應多事去何遲  
松菊還將咲爾痴  
又向門前栽五柳  
風來依舊折腰肢

張留侯

圯上相逢事已奇  
傳書進履有誰知  
若將恩怨分明較  
應悔當筵借箸時

春夜

沉沉深院漏丁丁  
半展紗窗戶未扃  
最是月斜花暗處  
惱人輕影小金鈴

桃

以下皆題畫

露濃霞重占春光  
礦面何人不弄妝  
莫笑枝頭貪結

子曾無言語對君王

墨菊

老圃從君借末光  
筆端瀟灑墨痕香  
陶潛籬落羅含宅  
耐得秋風幾夜霜

墨梅

記得虛齋夜月明  
一枝來向小窓橫  
道人不作羅浮夢  
玉骨何妨徹底清

山茶

自有芳心自作花  
何須春日競繁華  
雪中看取紅于錦  
梅把寒梅傲骨誇

芙蓉

默默江干歛翠蛾  
清秋羅襪強凌波  
只應不得東皇賞  
開落蘆花隊裡多

荷

亭亭獨立俯中流  
玉佩仙人碧玉樓  
漫把六郎輕比擬  
從來君子本無儔

梔子

蒼筤林中共舊綠  
兜羅香氣散諸天  
世人只解同心好  
多少同心付可憐

佛手

從來得月偏忘指  
覆雨翻雲也不難  
散盡黃金君莫笑  
尚留空手畫中看

題蘭

戲與幽芳一寫真  
華花飛落墨痕新  
若嫌冷淡難隨俗  
巖谷如今有幾人

興來潑墨滿吟箋  
半是張顛半米顛  
醉眼迷離渾不辨  
憑君持作畫圖傳

曉窓喚起語移時  
寫得騷人九畹姿  
世眼大都看色相  
枝頭悔不點燕支

不共青芝石上栽  
肯容荆棘與莓苔  
根苗淨洗無塵土  
只待東風送雨來

蓮社相過怕皺眉  
雌霓愁客讀新詩  
心知只可貽芳草  
特地因君畫一枝

悲訝回首憶同遊老大空餘兩鬢秋  
酒語詩情和別恨一時多向筆端收

讀罷離騷酒一壺殘燈照影夜猶孤  
寫來如夢復如幻未審朝看得似無

懶踏長安九陌塵獨憐空谷十分春  
毫端畫破虛空界想見行吟澤畔人

眼界空花假復真花花葉葉淨無塵  
離披滿紙原非畫半似騷人現化身

吳興博雅自能工思肖孤忠更不同  
今日濡毫成底事不如還學畫幽風

滿眼繁華付劫灰南朝金粉有餘哀  
何如空谷無人

到自覺香風撲面來

經年風雨苦漫漫比戶心闌桂玉難荆有一枝殘筆  
在寒號數裡寫幽蘭

莫怪經旬只掩門青山常被雨雲吞寫將芳草貽君  
讀筆筆無非是淚痕

華是徐妃妝半面葉如海嶽筆縱橫詩人自寫襟懷  
意只有靈均識此情

題蘭竹

墨有清香筆有神幽篁瘦影西無塵空齋尺幅涵高  
遠不是江皋即渭濱

暗風拂拂雨脩脩讀向山窓夜更幽為問何人遺韻

在前湖州與後長洲

半面蘭

花影蕭疎月影長  
淡無金粉趁容光  
綠知不得君王寵  
也學徐妃半面妝

哭友

枝頭銷減十分紅  
盡日無人小院空  
花自願飛春自老  
枉勞杜宇怨東風

題草堂讀書圖

碧水繞門松竹殷  
草堂白日常陰陰  
子長不作子雲死  
更有讀書何處尋

秋宵

夢魂不到枕函邊無限茫茫付可憐一種最難排遣  
處寒蛩啼斷未明天

題席氏南園

紅睡軒中幾樹花可憐開落向誰誇主人去後閒池  
館剩有垂楊噪暮鴉

嘉禾道中

扁舟遲日恣游揚直把他鄉認故鄉一路野花看不  
盡淡紅香白總春光

題雙鯉圖

曾傳尺素到江濱妙墨閒情寫得真遊咏不須頭角  
異入雲燒尾自驚人

勢把黃流徹底翻遠乘雷雨上龍門為霖萬里人爭羨肯就綸竿一餌吞

相思鳥

翠衿短趾最殷紅占水鴛鴦約畧同總使自來還自去此生何計脫樊籠

乞巧詞同城南作

再拜雙星致一詞巧思應不抵相思煩君織盡愁千尺不放離愁剩一絲

重過和友人作

去年閒到角門時花裡紅兒按竹枝今日重來深院靜桐花滿地綉簾垂

陶穀驛亭圖

為有樽前暗斷腸  
風流文采屬南唐  
郵亭一夜人歸去  
羞殺秦娘與杜娘

風

飛花捲葉亂長空  
解慍由來四海同  
一自騷人賦成後  
土囊蘋末總無雄

雲

一片飛來淡似煙  
湏臾作勢滿天邊  
為霖總繫蒼生望  
掩月藏星亦可憐

月

分明如鏡淨無塵  
高傍雲霄未可親  
千古祇能圓又

缺更無他技照臨人

露

無般偏覺濕羅衣  
脈脈偷從夜氣飛  
殢上何嘗非潤物  
只愁無力見朝暉